

## BELIA DAN KESEDERHANAAN GLOBAL: KE ARAH PEMBENTUKAN KOMUNITI ASEAN

MUHAMMAD ISMAIL AMINUDDIN

### ABSTRAK

*Pada Sidang Kemuncak ASEAN ke-18 di Jakarta, Indonesia 2011, Perdana Menteri Malaysia Dato Sri Mohd Najib Tun Abdul Razak telah memperkenalkan konsep Kesederhanaan Global melalui Global Movement of Moderates (GMM) sebagai suatu jalan terbaik dalam mencapai kesepaduan dalam kalangan negara anggota ASEAN. Belia sebagai generasi pelapis negara yang akan mencorakkan dasar negara perlulah mempunyai garis fahaman yang sederhana bagi membendung kecenderungan berpihak (bias) dengan sesuatu ideologi. Melihat kepada konsep komuniti bayangan atau Imagine Community oleh Benedict Anderson (1991), beliau menjelaskan bahawa perasaan sepunya yang dikongsikan bersama dan merentasi pelbagai bahagian dalam sesebuah negara. Suatu perasaan yang dikongsikan bersama (budaya kebangsaan) dilihat sebagai usaha yang akan membawa kepada kesepaduan penduduk. Hal ini sesuai diadaptasikan ke dalam pembentukan komuniti ASEAN yang bakal digerakkan oleh golongan belia khasnya Malaysia ke arah kesepaduan sosial dalam kalangan negara ASEAN. Kepengerusan ASEAN 2015 telah dilangsungkan di Malaysia pada tahun 2015 yang membabitkan Sidang Kemuncak ASEAN ke-26 dan ke-27 yang mana konsensus bersama dalam mewujudkan komuniti ASEAN ini telah dipersetujui dan ditandatangani pada 22 November 2015 di Kuala Lumpur. Tuntasnya wacana ini bakal memperlihatkan objektifnya iaitu bagaimana belia mampu memberikan kelangsungan dalam menjayakan pembentukan komuniti ASEAN, belia sebagai mediasi dalam menyatu-padukan perbezaan ideologi dan kelompok etnik dalam kalangan negara ASEAN bagi mencapai kesepaduan, dan akhirnya apakah belia merupakan kelompok signifikan yang harus diangkat sebagai sosok yang mampu menjayakan pembentukan komuniti ASEAN pada peringkat seterusnya.*

**Kata Kunci:** Belia, Komuniti ASEAN, Kesederhanaan Global, Komuniti Bayangan

### ABSTRACT

*At the 18<sup>th</sup> ASEAN Summit in Jakarta, Indonesia 2011, and the Prime Minister of Malaysia Dato Sri Mohd Najib Tun Abdul Razak introduced the concept of Global Moderation through the Global Movement of Moderates (GMM) as the best approach to realize integration among ASEAN member countries. As future generation, the youth are responsible to shape national policy and lead their respective nation. They should be moderate with their line of thoughts or thinking that are relative and not exhibit any extreme biases to curb ideological extremism. Looking at the concept of Imagined Community introduced by the late Benedict Anderson (1991), which refers to mutual feeling being shared together across*

*diverse sector of one particular country. A feeling shared together (national culture) is seen as an effort to enhance people's integration. This concept is undoubtedly suitable for ASEAN community. The youth is the driving force towards realizing a strong ASEAN community. Malaysian youth is moving towards social integration among ASEAN countries. During ASEAN Chairmanship, 2015 held in Malaysia a consensus to realize ASEAN community was signed on 22 November 2015. This discourse is intended to illuminate how youth can present continuity to the success of the establishment ASEAN community and function as a mediator to unite different ideologies and ethnic groups among member countries to achieve social cohesion. In summation, the youth plays an important role to ensure the establishment of a stronger and united ASEAN community in the future.*

**Keywords:** Youth, ASEAN Community, Global Moderation, Imagined Community

## PENGENALAN

Pada ketika dunia menghadapi kemajuan era, hal ini tidak terkecuali berlaku dalam kalangan masyarakatnya. Masyarakat atau dikenali sebagai komuniti merupakan kelompok atau entiti yang mendiami sesuatu kawasan samada negara, negeri, daerah atau kawasan setempat dan hidup di bawah satu pemerintahan. Berdasarkan kepada Pusat Rujukan Persuratan Melayu yang menjelaskan takrifan komuniti sebagai orang yang tinggal di sesuatu tempat, daerah, negara dan sebagainya (di bawah satu pemerintahan) yang meliputi masyarakat keseluruhannya. Berkenaan dengan komuniti, wacana penulisan ini terarah kepada kelompok belia dalam komuniti berkenaan. Belia merupakan salah satu daripada entiti yang tergolong dalam kumpulan komuniti dalam sesebuah masyarakat. Dalam konteks ini, belia dilihat sebagai kelompok masyarakat yang sangat signifikan dalam menjalankan segala dasar dan matlamat kerajaan khususnya serta kemampuan dan kebolehpayaan belia menjadi tenaga penggerak ke arah pelaksanaan dasar-dasar kerajaan.

Pada tahun 2010 melalui Perhimpunan Agung Pertubuhan Bangsa-Bangsa Bersatu (PBB), Perdana Menteri Dato Sri Mohd Najib Tun Abdul Razak telah mengilahkan kepada dunia berkenaan dengan Gerakan Kesederhanaan Global (Global Movement Of Moderates). Beliau melihat bahawa kini telah tiba masanya dunia mengamalkan kesederhanaan berbanding konfrantasi dalam menghadapi atau menyelesaikan sesuatu isu. Keadaan ini dilihat sebagai sebuah bentuk diplomasi yang mengutamakan keamanan berbanding konflik yang perlu dilalui. Usaha murni ini diteruskan lagi pada Sidang Kemuncak ASEAN ke-18 di Jakarta (2011), yang mana Perdana Menteri Malaysia Dato Sri Mohd Najib Tun Abdul Razak sekali lagi telah memperkenalkan Global Movement of Moderates (GMM) kepada ahli anggota ASEAN. Agenda ini kemudiaannya diteruskan lagi pada Sidang Kemuncak ASEAN ke-12 di Phnom Penh Kemboja untuk dinilai dan diaplikasikan dalam kalangan negara anggota ASEAN.

Berlandaskan kepada amalan moderat atau kesederhanaan global ini, kelompok belia yang dilihat sebagai pelapis negara perlu meresapi nilai kesederhanaan ini seterusnya membawa agenda kesederhanaan global ini ke tahap yang lebih tinggi khasnya dalam membentuk sebuah komuniti yang berjaya dan berkesan. Kepelbagai masyarakat yang merentasi etnik, budaya dan ras dalam rantau ASEAN memberikan suatu bentuk cabaran kepada belia dalam membawa agenda Komuniti ASEAN secara keseluruhannya. Justeru, harapan yang tinggi diletakkan di bahu kelompok belia sememangnya suatu beban yang berat namun melalui inisiatif dan komitmen bersama, kesukaran dan beban ini semestinya dapat dihadapi secara bersama.

Keberkesanan Malaysia membentuk sebuah negara demokrasi yang unggul tercipta apabila mampu menolak ramalan ‘prophets of doom and gloom’ yang mengatakan bahawa kepelbagaian kaum mampu mendorong kepada kemusnahan Malaysia sama sekali tidak bertepatan (Najib Razak, 2011). Sebelum itu, Najib turut merealisasikan hasrat murni ini pada tahun 2010 dengan mengesyorkan pendekatan wasatiyyahiii (moderat) ketika berucap di dalam Persidangan Agung Pertubuhan Bangsa-Bangsa Bersatu (PBB) di New York pada 27 September 2010. Najib berkata, pendekatan moderat ini sekaligus mampu meredakan fahaman ekstremis sesetengah pihak yang cuba mewujudkan jurang yang lebih luas diantara Islam dan Barat. Keganasan yang meletus di negara-negara tertentu kebanyakannya disebabkan oleh kumpulan-kumpulan pelampau yang memperjuangkan agenda mereka yang sempit (Abdullah MD. Zin: 62).

Dalam hal ini juga, Malaysia sebagai sebuah Negara yang Sedang Membangun (NSM) pastinya memilih pendekatan yang mampu memberikan kesan yang positif kepada negara dan rakyat. Justeru, dalam hal ini kepelbagaian yang wujud dalam masyarakat Malaysia sedikit sebanyak memberikan kesan dalam “penyatuan” yang ingin dilaksanakan. Melalui amalan moderat ini, berkemungkinan matlamat penubuhan Komuniti ASEAN ini mampu digapai selaras dengan keutuhan nilai kesederhanaan yang dicanangkan.

Secara ringkasnya, wacana ini cuba melihat terhadap signifikan kelompok belia sebagai kelompok masyarakat yang dapat menjadikan impian pembentukan sebuah komuniti yang digelar sebagai Komuniti ASEAN yang telah disepakati menerusi Sidang Kemuncak ASEAN ke 27 di Malaysia pada tahun 2015. Justeru dalam ke arah pembinaan Komuniti ASEAN ini, kewajaran kelompok belia sebagai generasi pelapis negara dilihat sebagai elemen utama kepada kejayaan ini. Segala dasar dan misi yang dirangka seterusnya akan digerakkan oleh belia samada dalam pemerintahan, aktiviti keseharian, mahupun dengan memupuk budaya mencintai, menghargai dan menyanjungi kepelbagaian (perbezaan) yang ada dalam kalangan masyarakat. Malaysia sebagai negara yang mewujudkan Komuniti ASEAN ini dilihat sebagai penanda aras atau bench mark kepada keupayaan dan kejayaan pembentukan ini.

### Komuniti ASEAN

Seperti sedia maklum, Kepengerusian ASEAN 2015 yang telah dilangsungkan di Malaysia pada tahun 2015 yang mana telah melalui dua fasa persetujuan. Setiap fasa telah diadakan perbincangan dan mesyuarat khusus melalui peringkat Kementerian-Kementerian ASEAN, peringkat Menteri-Menteri Luar ASEAN dan akhirnya diperingkat Ketua-Ketua Negara ASEAN. Pada Sidang Kemuncak ASEAN ke-26 dan ke-27 yang mana konsensus bersama dalam mewujudkan komuniti ASEAN ini telah dipersetujui dan ditandatangani pada 22 November 2015 di Kuala Lumpur. Hal ini merupakan suatu titik tolak yang sangat signifikan dan bersejarah bagi negara kerana, agenda penubuhan Komuniti ASEAN ini telah mendapat mandat dari 10 buah negara anggota ASEAN.

Sidang Kemuncak ASEAN tahun 2015 yang mana bertunjangkan kepada tema “Warga Kita, Komuniti Kita, Visi Kita” yang berlandaskan kepada tema am ASEAN iaitu “ASEAN Berpaksikan Rakyat”, seharusnya hal ini tidak mendatangkan sebarang kekangan malah memberikan suatu kelebihan kepada pelbagai pihak dalam merealisasikan dan merencanakan pembentukan Komuniti ASEAN ini. Pembentukan Komuniti ASEAN ini merangkumi 3 tonggak utamanya iaitu Komuniti Ekonomi ASEAN (AEC), Komuniti Politik Keselamatan (APSC) dan Komuniti Sosio-Budaya (ASCC). Ketiga-tiga tonggak ini bergerak seiring dalam memastikan penubuhan Komuniti ASEAN ini mencapai matlamatnya. (Berita Harian, 2015).

Pemerhati serantau berpendapat, Komuniti ASEAN ini ada cabaran besar kerana wujudnya perbezaan budaya, kadar dan taraf pembangunan ekonomi yang terlalu tinggi seperti antara Singapura dan Laos serta sistem politik yang pelbagai. Tidak seperti proses pembentukan komuniti serantau lain seperti Kesatuan Eropah (EU), pembabitatan masyarakat dalam pembentukan Komuniti ASEAN adalah minimum. Dasar dan proses pembentukan Komuniti ASEAN yang bersifat ‘top-down’ sedikit sebanyak memberikan cabaran ke arah penyampaian (Berita Harian 2015). Namun, usaha ini haruslah dilipatgandakan dan sememangnya memberikan cabaran khasnya kepada generasi pelapis negara iaitu kelompok belia dalam meneruskan agenda pembentukan ini.

Komuniti ASEAN adalah inti pati yang sangat penting, acuan komuniti ASEAN yang ingin digarap oleh Malaysia adalah dengan mewujudkan komuniti ASEAN bersifat ‘political cohesive’ (padu dari segi politik) dan bersepadu (integrated), manakala daripada segi ekonomi yang lebih kukuh serta mantap dari segi pembangunan sosial dan kebudayaan. Hal ini membabitkan kaedah untuk menyedia dan memperkukuhkan proses penyepaduan bagi merealisasikan Komuniti ASEAN berasaskan peraturan dan berorientasikan rakyat serta ASEAN berpaksikan rakyat bagi mengatasi jurang pembangunan. Pembentukan Komuniti ASEAN akan memberi nilai tambah dan manfaat kepada Malaysia (Berita Harian 2016).

Dalam aspek sosial dan budaya, komuniti ASEAN akan mengembangkan

lagi budaya Malaysia menjadi sebahagian dari budaya serantau. Tambahan pula, dengan pengenalan saluran Baru televisyen ASEAN yang dikenali dengan ASEAN-Go, serta mobiliti pelancongan serantau, Malaysia dijangka akan menarik lebih banyak pergerakan rakyat ASEAN ke negara ini. Manakala dari aspek ekonomi pula, pengurangan dan penghapusan cukai atau tarif barangan oleh negara anggota memberikan Malaysia pasaran yang lebih besar untuk produknya. Justeru, pelbagai inisiatif yang dilihat sebagai nilai tambah kepada negara seharusnya dilihat sebagai suatu perancangan yang strategik melalui kaedah serampang dua mata ini (Berita Harian 2015).

### ***Belia Dan Kesederhanaan Global***

Belia merupakan suatu bentuk aset penting kepada negara. Dalam konteks ini, belia merupakan cerminan kepada keupayaan kerajaan dalam mempromosikan dasar dan agenda pemerintahan yang direncanakan. Justeru, bagi menolak fahaman ekstremis dalam kalangan belia, peranan kerajaan khasnya dari agensi-agensi kerajaan sememangnya memberikan suatu bentuk cabaran, keupayaan dan inisiatif yang mampu mencorakkan identiti belia. Jika belia hanya condong kepada satu fahaman, mendalami satu pegangan tanpa melihat kepada kebaikan lain, maka disini kerajaan telah gagal dalam mencorakkan generasi pelapis negara dalam melihat proses integrasi dalam kalangan masyarakat berjalan dengan lancar. Mengikut Menteri Belia dan Sukan, YB Khairy Jamaluddin berkata fahaman ekstremis yang datang dalam pelbagai bentuk merupakan suatu ancaman kepada perpaduan negara dan perlu ditangani dengan konsisten (The Borneo Post 2015). Melalui Majlis Belia Malaysia (MBM) dan Kementerian Belia dan Sukan sendiri, pengharapan Khairy kepada belia agar tidak terjebak dengan kegiatan ekstremisme melalui peranan dan usaha yang dilakukan oleh kedua-dua badan ini. Khairy berkata, beliau sentiasa mendengar MBM membawa agenda kesederhanaan dan perpaduan dalam kalangan belia. Jika suara ini sentiasa dibawa oleh MBM, maka beliau yakin bahawa belia tidak akan tertarik dengan sebarang kegiatan ekstremisme (The Borneo Post 2015).

Tahun 2015 merupakan tahun cabaran buat Malaysia yang mana telah berjaya memegang dua kerusi utama bagi penggal berkenaan iaitu menjadi Kepengerusian ASEAN 2015 dan menjadi ahli tidak tetap Majlis Keselamatan Pertubuhan Bangsa-bangsa Bersatu (PBB) selama dua tahun, iaitu hingga 2016. Datuk Saifuddin Abdullah yang merupakan Pengerusi Gerakkan Kesederhanaan Global (GMM) pada ketika itu melihat pencapaian Malaysia menduduki kedua-dua kerusi berkenaan sebagai suatu pencapaian yang istimewa (Sinar Harian 2014). Namun cabaran buat negara ialah bagaimana Malaysia mampu mempromosikan kesederhanaan global ini kepada dunia dalam tempoh dua tahun memegang kedua-dua kerusi ini.

Bagi Saifuddin, peranan GMM sebagai badan pemikir akan menggunakan kedua-dua kedudukan tersebut untuk melipatgandakan lima inisiatif utama iaitu diplomasi digital, ancaman keselamatan tak-tradisional, demokrasi dan governans, pembangunan inklusif dan peranan masyarakat sivil khususnya belia dan wanita

(Sinar Harian 2014). Melalui Majlis Konsultasi Perpaduan Negara (MKPN) yang ditubuhkan Perdana Menteri Dato Sri Mohd Najib Tun Abdul Razak, majlis ini dilihat sedikit sebanyak menyentuh akan perbahasan mengenai penggubalan undang-undang, literasi perlembagaan, pembangunan inklusif, integrasi nasional, dan peranan belia. Justeru, peranan belia merupakan satu langkah tepat dalam mempromosikan nilai kesederhanaan kepada masyarakat setempat, serantau dan seterusnya dalam kalangan masyarakat dunia. Melalui peranan belia yang berlandaskan prinsip kesederhanaan ini, maka elemen Komuniti ASEAN termasuklah mempromosikan Asia Tenggara (ASEAN) sebagai wilayah yang aman, stabil dan makmur selain masyarakatnya yang saling menjaga hubungan dan berkongsi perpaduan dalam perbezaan (Berita Harian 2015).

### ***Cabaran Belia Dalam Merencanakan Kesederhanaan Global***

Dalam hal ini, belia adalah kelompok yang mudah terpengaruh dalam sesuatu fahaman, tindakan dan ideologi. Kaedah atau inisiatif yang diambil oleh kerajaan sangatlah memberikan kesan kepada golongan belia dalam menterjemahkan tindakan mereka keseharian. Pelbagai inisiatif kerajaan telah dilaksanakan seperti penubuhan Majlis Belia Malaysia, Yayasan Sukarelawan Siswa di bawah tanggungjawab Kementerian Pengajian Tinggi, dan pelbagai persatuan belia lain. Apa yang direncanakan ialah dalam memastikan belia tidak terkeluar dari landasan sosial, menjadi mediasi (perantara) kepada kerajaan dengan masyarakat dan menyampaikan dasar dan perkhidmatan kerajaan kepada masyarakat. Peranan yang sama dimainkan oleh belia dalam mempromosikan perpaduan dalam kalangan negara serantau amatlah dititikberatkan.

Menteri Pertahanan, Datuk Seri Hishammuddin Hussein berkata mencegah kalangan belia daripada menjadi golongan radikal adalah cabaran terbesar terhadap keselamatan negara di Malaysia. Beliau berkata:

*“...bagi diri saya, kesederhanaan terutamanya dalam konteks di Malaysia adalah tentang penerimaan. Kuncinya adalah bagi kita semua untuk menerima perbezaan kita, mencari titik persamaan bagi masalah yang kita hadapi dan bersama-sama menyelesaikannya...”*

(Berita Harian 2015).

Wujudnya inisiatif kerajaan seperti Program Latihan Khidmat Negara (PLKN) merupakan suatu usaha ke arah membendung budaya subversif dan ekstrem ini. NALS 2015 pula merupakan suatu platform yang diwujudkan oleh Kelab UMNO Australia dengan kerjasama Kelab UMNO Luar Negara sebagai platform untuk pelajar dan belia dalam membimbing dan memupuk ciri-ciri kepimpinan serta untuk melahirkan pemimpin masa hadapan (Berita Harian 2015).

Bagi Hishammuddin, beliau bersetuju bahawa anggota masyarakat khasnya belia merupakan kelompok dalam kalangan masyarakat yang paling mudah untuk terpengaruh dengan gejala radikalsime. Memetik kepada kata-katanya beliau

berkata:

*“...Jangan kita lupa bahawa matlamat ekstremisme adalah untuk mempengaruhi sasarannya untuk menjalankan kegiatan subversif. Oleh itu, kita perlu mempunyai komitmen lebih kukuh terhadap nilai-nilai kita, terutamanya kewujudan bersama secara aman dan meraikan perbezaan kita...”* (Berita Harian 2015).

### ***Belia Ke Arah Pembentukan Komuniti ASEAN***

Tema am “ASEAN Berpaksikan Rakyat” 2015 sememangnya memberikan gambaran positif ke arah pembentukannya. Angkatan Belia Islam Malaysia (ABIM), Majlis Belia Malaysia (MBM) dan Kementerian Belia dan Sukan (KBS) memainkan peranan penting dalam menjayakan pembentukan Komuniti ASEAN ini. Hal ini kerana, golongan belialah merupakan unit saham yang paling bernilai dalam kalangan masyarakat kerana bertindak sebagai perantara kepada kerajaan dan masyarakat. Golongan belia yang aktif, yang mempunyai nilai kebolehpasaran yang tinggi mampu menjadi agen yang terbaik dalam menyampaikan perkhidmatan kerajaan kepada rakyat, manakala dalam konteks serantau sebagai mediasi perpaduan yang akan membawa agenda perpaduan nasional dalam kalangan negara serantau.

ABIM pada tahun 2014 melalui perbincangan meja bulat (RTD) bersama GMM berpendapat bahawa belia merupakan kelompok yang signifikan kepada negara. Seterusnya belia berperanan penting yang akan membawa hala tuju negara ke arah pembentukan sebuah komuniti integrasi yang diinginkan. ABIM turut menggesa supaya belia, pertubuhan dan pemimpin belia supaya memainkan peranan aktif dalam meningkatkan kerjasama sesama rakan-rakan dalam negara anggota khasnya dalam pembangunan belia dan pelbagai bidang lain seperti pertukaran belia, kerjasama penyelidikan isu belia, peace building dan kesukarelawanan kerana generasi muda merupakan paksi kepada kejayaan ASEAN pada masa kini dan masa hadapan (ABIM 2014). Gesaan ini turut diperlihatkan dalam inisiatif Yayasan Sukarelawan Siswa yang sering mengadakan program pertukaran pelajar dan mengadakan program pertukaran budaya ke negara ASEAN. Antara aktiviti yang telah dijalankan seperti memberikan pendidikan percuma kepada kanak-kanak, melakukan aktiviti amal seperti gotong-royong membersihkan kawasan kampung dan masjid, menyalurkan tenaga khidmat pelajar (mahasiswa universiti awam) dalam aktiviti kemasyarakatan dan lain-lain program.

Persidangan Belia ASEAN 2015 yang dianjurkan oleh Institut Penyelidikan Pembangunan Belia Malaysia (IYRES) di bawah Kementerian Belia dan Sukan (KBS), dengan kerjasama Majlis Belia Malaysia (MBM) telah melibatkan keseluruhan wakil belia dalam kalangan negara anggota ASEAN. Persidangan ini telah diadakan di Pusat Dagangan Dunia Putra (PWTC) pada 18 – 20 November 2015 yang mana telah berlangsung dengan jayanya. Antara matlamat yang dipersetujui adalah pertukaran pandangan dan idea antara kelompok belia ASEAN, faktor kesihatan, keselamatan rentas sempadan khususnya ASEAN, peluang pekerjaan



dan ekonomi dalam kalangan belia ASEAN, pertukaran budaya dan integrasi dalam kalangan belia ASEAN. Pertemuan pelbagai hala antara pimpinan belia ASEAN seharusnya dijadikan sebagai suatu platform yang terbaik dalam menyalurkan segala bentuk pandangan dan inisiatif yang ingin disampaikan.

Sultan Brunei, Sultan Hassanal Bolkiah turut berkongsi nada yang sama berkenaan dengan peranan belia dalam ASEAN (Sidang Kemuncak ASEAN ke-20). Beliau menyatakan bahawa usaha menyatupadukan belia-belia melalui pertukaran-pertukaran juga akan meningkatkan kerjasama dan kesalingfahaman. Baginda merasakan bahawa belia adalah kelompok yang sangat signifikan dalam kalangan negara ASEAN kerana faktor pembawa, semangat dan kesungguhan generasi muda dalam bermasyarakat. Baginda melihat kepada tema am ASEAN iaitu people centred sebagai teras utama kepada kejayaan pembentukan Komuniti ASEAN ini (Pelita Brunei 2014). Belia yang merupakan penghuni terbesar dalam kalangan masyarakat di ASEAN sememangnya berperanan penting kepada kejayaan pembentukan ini. Pembangunan yang mapan serta nilai rakyat yang diangkat dalam kalangan masyarakat ASEAN, itulah penentu kepada kejayaan pembentukan ini.

### ***Peranan Belia Dalam Pembentukan Komuniti ASEAN***

Seperti dalam penjelasan bab sebelum ini, belia merupakan kelompok masyarakat terbesar di ASEAN yang mana merangkumi 60% (625 juta orang) daripada populasi penduduk di negara ASEAN (Ahmad Maslan 2016). Ahmad Maslan berkata belia sebagai kelompok pelapis sesebuah negara sememangnya berperanan penting dalam melaksanakan sesuatu dasar kerajaan. Beliau berkata belia merupakan kelompok yang berperanan penting dalam meningkatkan pertumbuhan ekonomi negara dan serantau. Justeru, tambahan beliau:

*“...Dengan 375 juta belia berusia bawah 35 tahun, sesungguhnya ASEAN merupakan rantau yang memiliki potensi besar serta laluan menarik bagi pelaburan langsung...”*

(Malaysian Digest 2016)

*“...Hari ini, mereka (belia) juga memainkan peranan penting dalam membentuk Komuniti ASEAN (yang ditubuhkan pada 31 Dis 2015)...”*

(Malaysian Digest 2016)

Ahmad Maslan mengambil contoh dengan membandingkan ASEAN dengan blok serantau lain seperti Kesatuan Eropah (EU), yang kini berdepan dengan isu Greying of Europe, di mana jumlah mereka yang berusia pertengahan dan berusia emas semakin banyak daripada belia. Ahmad Maslan berkata bahawa isu ini akan menjadi ciri yang menentukan landskap ekonomi EU beberapa dekad akan datang. Beliau melihat bahawa keadaan yang sama bagi negara maju yang lain seperti Jepun.

Keupayaan ASEAN, yang mana sebahagian besar penduduknya terdiri daripada belia, berbakat dan mahir, mempunyai potensi besar dari segi pasaran



bagi barang, perkhidmatan dan pelaburan. Menurut beliau, pada 2014, pelaburan langsung asing ASEAN secara kolektif berjumlah AS\$136 bilion (RM530.4 bilion), lebih tinggi daripada Amerika Syarikat dan China, manakala perdagangan antarabangnya pula meningkat hampir tiga kali ganda dalam tempoh 10 tahun lepas (Malaysian Digest 2016). Ahmad Maslan turut berkata, menjelang tahun 2050, ASEAN akan muncul sebagai kuasa ekonomi ke-4 terbesar di dunia.

Peranan mahasiswa universiti tempatan juga berperanan penting dalam mengeratkan hubungan dalam kalangan negara anggota. Mengikut Jessica Ong Hai Liaw (2015), beliau berkata bahawa peranan belia sebagai wakil pelajar, mentor dan universiti dari negara ASEAN dapat berbincang secara professional dan membina kekuatan jati diri serta menguatkan ketahanan mental sekaligus mengeratkan hubungan universiti-universiti tetangga negara ASEAN (Utusan Online 2015). Beliau yang berkhidmat sebagai pensyarah di Universiti Pertahanan Nasional Malaysia (UPNM) telah terlibat secara partisipasi dengan 34 orang pelajar UPNM ke Songkhla Thailand pada April 2015. Jessica menjelaskan bahawa selaras dengan kedudukan Malaysia sebagai Pengerusi ASEAN, mahasiswa UPNM mengatur langkah sebagai Duta Kecil Malaysia merentas sempadan di Thailand untuk memperkenalkan budaya Malaysia dan mengadakan forum akademik untuk membincangkan kerjasama yang boleh dijalin antara belia di ASEAN dan input perbincangan akan dibawa ke ASEAN (Utusan Online 2015).

Pada Sidang Kemuncak ASEAN ke-20, Sultan Brunei, Sultan Hassanal Bolkiah berkata,

*“...pentingnya peranan belia untuk masa hadapan, oleh itu adalah penting untuk terus menyediakan asas-asas bagi membina dan menggalakkan mereka memainkan peranan yang penting dalam usaha pembangunan Komuniti ASEAN...”* (Pelita Brunei 2013).

Dengan kerjasama dalam kalangan belia ASEAN, kelompok belia dapat mempelajari cara untuk menyelesaikan permasalahan masyarakat setempat, dan pada masa yang sama memperoleh pengetahuan dan pengalaman yang baru bagi meningkatkan kemahiran sendiri. Belia yang belajar di institusi pengajian tinggi mahupun yang telah menerima ijazah, sememangnya menjadikan mereka lebih kebolehpasaran dan berdaya saing.

Negara Brunei merupakan sebuah negara yang mementingkan keberadaan kelompok belianya. Justeru pelbagai inisiatif telah dilaksanakan dalam kalangan belianya untuk memastikan dapat bersaing dan membangunkan sahsiah diri dalam hidup bermasyarakat. Kepedulian berkenaan dengan pembangunan belia sangat dititikberatkan. Justeru, Brunei turut sama melancarkan Program Khidmat Bakti Negara persis kepada Program Latihan Khidmat Negara (PLKN) di Malaysia. Kerajaan Brunei bukan sahaja menjaga kualiti belianya malah turut sama menjaga hubungan serantau dengan mengadakan pelbagai inisiatif seperti kebudayaan

dan sukan dalam kalangan negara serantau sebagai usaha mengeratkan hubungan pelbagai hala. Antara bentuk program yang dijalankan seperti Trofi Hassanah Bolkiah (HBT) iaitu pertandingan bola sepak Belia ASEAN di bawah umur 21 tahun, dan program Kapal Belia Asia Tenggara (SSEAYP) yang melibatkan belia-belia di ASEAN.

### ***Sumbangan Belia Dalam Memperkasakan Komuniti ASEAN***

Dalam menggerakkan pembentukan komuniti ASEAN ini, tidak dapat lari dari sumbangan kelompok belia dalam pembinaannya. Ketua Menteri Melaka, Datuk Seri Idris Haron berkata bahawa, golongan belia perlu memainkan peranan aktif dalam pembangunan ekonomi negara masing-masing. Justeru, pendapat beliau ini berkisarkan kepada usaha dan gerak kerja belia dalam meningkatkan kadar pertumbuhan ekonomi negara di ASEAN selaras dengan teras utama dalam pembinaan Komuniti ASEAN iaitu pembentukan Komuniti Ekonomi ASEAN (AEC). Memetik kepada kata-katanya, Idris Haron berkata,

*“..Justeru, golongan ini perlu berperanan secara aktif dan sentiasa bersedia memaksimumkan peranan mereka dalam pembangunan ekonomi dalam kalangan komuniti ASEAN. Jadikan kawasan ASEAN sebagai kawasan yang aman, bebas, makmur dan berkecuali. Inilah peranan belia pada masa depan...”*  
(Utusan Online 2015).

Kualiti dan nilai yang ada pada belia tidak seharusnya dipandang enteng. Dalam hal ini, belia berperanan memberikan sumbangan sebagai agen atau mediator kepada kerajaan dalam menyampaikan perkhidmatan dan sumbangan kepada masyarakat. Sumbangan ini tidak hanya tertumpu kepada isu nasional malah turut meliputi keseluruhan kepentingan masyarakat di Asia Tenggara. Belia juga bertindak sebagai agen yang menyatu-padukan masyarakat, menjadi agen kepada proses integrasi, agen ASEAN dalam meningkatkan keharmonian, kestabilan dan kebajikan masyarakat secara keseluruhannya. Jaringan sosial dan kerjasama yang dipupuk dalam kalangan belia di ASEAN sememangnya suatu cabaran yang harus dihadapi oleh semua belia dalam kalangan negara anggota.

Justeru, Malaysia sebagai negara pencetus kepada pembentukan Komuniti ASEAN ini perlu memainkan peranan dan sumbangan yang lebih berbanding belia dalam kalangan negara anggota. Tidak hairanlah jika belia Malaysia dijadikan sebagai role model kepada belia di ASEAN suatu hari nanti. Cerminan ini memperlihatkan bahawa kualiti yang ada dalam kalangan belia di Malaysia sebagai kelebihan yang bermanfaat buat negara. Dengan kesedaran dan nilai kebertanggungjawaban ini, secara tidak langsung hal ini dapat membuka ruang dan peluang kepada kelompok belia untuk memperkasakan kekuatan komuniti itu sendiri. Usahasama yang dipamerkan oleh Yayasan Sukarelawan Siswa dibawah naungan Kementerian Pengajian Tinggi Malaysia sedikit sebanyak telah membantu dalam memperkasakan belia di Malaysia. Melalui program kesukarelawan ini, belia

(mahasiswa universiti) telah didedahkan dengan pelbagai perkara asas yang dapat membantu meningkatkan kualiti diri, kebolehpasaran dan keupayaan belia dalam memperkasakan kelompok mereka. Program sukarelawan ini dijadikan sebagai platform kepada mahasiswa untuk memberikan sumbang bakti kepada masyarakat khususnya selain dapat membuka hijab mahasiswa akan kesedaran dan tanggungjawab mereka kepada masyarakat.

Mahasiswa sebagai belia negara, seharusnya berbakti kepada masyarakat kerana secara prinsipnya, keberadaan mahasiswa di universiti adalah hasil daripada duit poket masyarakat. Maka, kepada masyarakat jumlah mahasiswa perlu menabur bakti kembali dan bukan untuk kantung sendiri. Sebagai contoh, Misi Sukarelawan Siswa Yss-Asean ke Champasak, Lao Pdr 2016 yang mana telah disertai seramai 44 orang sukarelawan siswa dari negara ASEAN termasuklah dari Malaysia telah berkampung selama dua minggu dalam misi pendidikan, kesihatan, komuniti dan teknologi maklumat. Dalam misi dengan kerjasama Kementerian Pendidikan dan Sukan (MoES) Lao PDR itu, sukarelawan siswa telah menjalankan kegiatan berasaskan konsep 'immersion' di mana mereka mendalami budaya dan kehidupan masyarakat setempat.

Selain itu, Persidangan Belia ASEAN [International Conference for Young Leaders] (ICYL) tahun 2015 yang dianjurkan oleh Institut Penyelidikan dan Pembangunan Belia Malaysia (IYRES) di bawah Kementerian Belia dan Sukan Malaysia telah berlangsung dengan jayanya. Matlamatnya adalah untuk berkongsi serta bertukar pandangan dan idea dalam kalangan belia di ASEAN, persidangan ini mampu mencorakkan kerjasama, tanggungjawab dan keprihatinan berkenaan isu serantau berdasarkan kepada tonggak Politik dan Keselamatan, Jaringan Sosial dan Kebudayaan, Transformasi Kepengerusian ASEAN, dan Partisipasi, Penghakupayaan dan Representasi Belia.

Pada Mesyuarat Ke-VII Menteri-Menteri Belia ASEAN (AMMY) dan Mesyuarat Ke-3 Menteri-Menteri Belia ASEAN+3 (AMMY+3) yang diadakan pada 20 Oktober 2011 di Hanoi, Vietnam, mesyuarat ini telah bersetuju menyokong beberapa program untuk dilaksanakan:

- ASEAN Young Leaders Exchange
- The ASEAN Young Entrepreneurs Festival
- ASEAN Youth Volunteers Programme
- Regional Workshop on Entrepreneurs Skills Training for the Development of ASEAN Out-of School Youth (OSY)
- Penubuhan Tabung Program Belia ASEAN

Justeru, pelbagai inisiatif dan sumbangan yang melibatkan belia ASEAN telah berjaya dirangka dan dijalankan selain terdapat beberapa inisiatif lain yang masih dalam peringkat perancangan. Berikut merupakan inisiatif yang telah dan akan dijalankan bagi memperkasakan belia ASEAN sehingga tahun 2015

- Persidangan Belia ASEAN
- Sukan ASEAN (Sukan SEA)
- Hassanal Bolkiah Trophy (HBT)
- Program Kapal Belia Asia Tenggara (SSEAYP)
- Persidangan Meja Bulat Belia: Gagasan Komuniti ASEAN (IYRES)
- Kuiz Khas ASEAN 2015
- Sambutan Hari ASEAN
- Program Sukarela Belia Asean

Sumbangan belia dalam memperkasakan pembentukan Komuniti ASEAN memang tidak dapat disangkal lagi. Belia dilihat mampu memberikan kelebihan bagi sesebuah negara kerana semangat dan kebolehan yang tinggi yang ada pada diri mereka. Dengan keadaan dunia yang semakin mencapai permodenan dan kemajuan, perkongsian idea dan pandangan rentas sempadan tidak lagi menjadi kekangan malah hal ini dapat diutuhkan lagi dengan wujudnya pelbagai inisiatif dan program yang dirangka bagi mencapai matlamat dan kepentingan bersama. Sebagai contoh dalam isu kesihatan dan keselamatan rentas sempadan seperti banjir, pencemaran udara yang berlaku saban tahun, golongan belia mampu memberikan pandangan dan penyelesaian yang jitu melalui program dan usahasama antara negara. Hal inilah yang menjadi teras utama kepada faktor belia sebagai agen yang signifikan bagi pembentukan Komuniti ASEAN ini.

### ***Konsep Komuniti Bayangan Dalam Pembentukan Komuniti ASEAN***

Ben Anderson (1991) merujuk 'Bangsa' sebagai sebuah Komuniti Bayangan. Beliau menjelaskan bahawa suatu perasaan sepunya yang dikongsi bersama dan merentasi pelbagai bahagian dalam sesebuah negara. Kepelbagaian dan perbezaan bangsa yang tidak dijadikan perbezaan malah diraikan demi kepentingan bersama. Jurang yang ada tidak dijadikan sebagai suatu sempadan namun, kepelbagaian ini dimanfaatkan, disanjung dan dihormati bersama dalam hidup bermasyarakat. Berkenaan dengan semangat nasionalisme yang ada pada setiap negara ASEAN, kepelbagaian ini tidak seharusnya dijadikan sebagai sempadan jurang bagi perpaduan, penyatupaduan dan kesepaduan. Malah, kepelbagaian ini diraikan demi kepentingan bersama, boleh wujudnya perkongsian budaya serantau, pemerkasaan nilai dan sosiobudaya yang serumpun dijadikan sebagai kelebihan bersama.

Dalam konteks ini, komuniti ASEAN merupakan masyarakat yang majmuk dan berbilang bangsa namun disatukan di bawah payung ASEAN untuk lebih bersatupadu, harmoni dan berupaya membina sebuah kelompok komuniti yang berjaya atas persefahaman dan kesepaduan yang terjalin. Persefahaman, pertukaran pendapat rentas sempadan, perkongsian sumber ekonomi, kestabilan politik dan keselamatan, dan konsep perpaduan dalam perbezaan menjadi teras ke arah pembentukan ini. 'Sebuah ASEAN Untuk Semua' harus difahami dan kerajaan Malaysia khususnya belia yang berperanan sama mewujudkan sebuah rantau ASEAN yang lebih stabil, aman dan makmur dengan memastikan ASEAN bebas daripada sebarang peperangan, konflik agama dan kaum, perebutan wilayah dan warisan budaya,

dan kes pembunuhan dengan menggalakkan dialog dan penyelesaian aman dimeja rundingan (Jessica Ong Hai Liaw 2015).

Perasaan sepunya mengikut Anderson seharusnya tidak menjadi perbezaan yang jelas di rantau ASEAN walaupun terdapat kepelbagaian etnik, ras, dan agama namun hal ini dapat disatukan melalui persamaan budaya serumpun dalam kalangan negara di Asia Tenggara yang telah wujud sekian lama. Kepelbagaian ini dijadikan sebagai kekuatan kepada negara di rantau ASEAN dan oleh kerana itulah, maka termeterainya perjanjian pembentukan Komuniti ASEAN ini pada November 2015 lepas.

### **RUMUSAN**

Tuntasnya, golongan belia dilihat berperanan penting sebagai generasi pelapis negara yang bakal menggagas tanggungjawab negara pada masa hadapan. Melalui kesedaran, perkongsian idea dan pandangan, serta pemerkasaan terhadap kelompok belia, sememangnya akan memberikan manfaat dan kelebihan pada masa hadapan. Usahasama dari pelbagai pihak serta hubungan akrab dalam kalangan negara serantau (ASEAN) sedikit sebanyak memberikan suatu gambaran positif dalam mencapai keberkesanan pembentukannya. Dengan wujudnya sebuah komuniti yang berasaskan kepada perasaan sepunya serantau, perkongsian budaya, kesefahaman dan toleransi yang tinggi mampu menjadikan ASEAN sebagai sebuah rantau yang berjaya seperti mana harapan dalam menjadikan ASEAN sebagai kuasa ekonomi keempat terbesar menjelang tahun 2040.

Keupayaan dan kesedaran yang dimiliki belia pada hari ini sedikit sebanyak berkisar terhadap pembentukan sesebuah komuniti. Komuniti ASEAN adalah inti pati yang sangat penting, acuan komuniti ASEAN yang ingin digarap oleh Malaysia adalah dengan mewujudkan komuniti ASEAN bersifat 'political cohesive' (padu dari segi politik) dan bersepadu (integrated), manakala daripada segi ekonomi yang lebih kukuh serta mantap dari segi pembangunan sosial dan kebudayaan. Hal ini membabitkan kaedah untuk menyediakan dan memperkukuhkan proses penyepaduan bagi merealisasikan Komuniti ASEAN berasaskan peraturan dan berorientasikan rakyat serta ASEAN berpaksikan rakyat bagi mengatasi jurang pembangunan. Pembentukan Komuniti ASEAN akan memberi nilai tambah dan manfaat kepada Malaysia (Berita Harian 2016).

Dengan termeterai penubuhan Komuniti ASEAN (2015), maka wujudnya komuniti rentas sempadan yang berpaksikan kepada kerjasama serantau, tanggungjawab dan kepentingan bersama dalam mencapai matlamat-matlamat yang dimeterai dalam pembentukan Komuniti ASEAN ini. Kerjasama dan kesalingfahaman yang tinggi mampu mencorakkan kejayaan unggul pembentukan Komuniti ASEAN dan seterusnya memperkasakan ASEAN itu sendiri.

**RUJUKAN**

- Abim. 2014. Belia Perlu Persiapkan Diri Hadapi Gagasan Komuniti ASEAN. <http://www.abim.org.my/siaran-sentral/item/404-belia-perlu-persiapkan-diri-hadapi-gagasan-komuniti-asean.html> 11 Jun 2016
- Anon. 2008 Komuniti. <http://prpm.dbp.gov.my/Search.aspx?k=masyarakat+komuniti> 10 Jun 2016
- Anon. 2012. Belia Berperanan Penting Bentuk Komuniti Progresif. [http://iyres.gov.my/index.php?option=com\\_content&view=article&id=405:belia-berperanan-penting-bentuk-komuniti-progresif-asean&catid=135:latest-news&Itemid=229&lang=ms](http://iyres.gov.my/index.php?option=com_content&view=article&id=405:belia-berperanan-penting-bentuk-komuniti-progresif-asean&catid=135:latest-news&Itemid=229&lang=ms) 10 Jun 2016
- Anon. 2012. Pemahaman Wasatiyyah dan Ancaman Terhadap Islam Masa Kini. Kuala Lumpur: Sekretariat Seminar Pemahaman Wasatiyyah dan 1Malaysia.
- Anon. 2014. Persidangan Meja Bulat Belia: Gagasan Komuniti ASEAN. [http://www.ippbm.gov.my/index.php?option=com\\_content&view=article&layout=edit&id=838&lang=ms](http://www.ippbm.gov.my/index.php?option=com_content&view=article&layout=edit&id=838&lang=ms) 9 Jun 2016
- Anon. 2014. Rakyat Tonggak Utama Komuniti ASEAN. <http://pelitabrunei.gov.bn/sukan/item/15035-rakyat-tonggak-utama-komuniti-asean> 10 Jun 2016
- Anon. 2014. Tahun Cabaran Kesederhanaan. <http://www.sinarharian.com.my/mobile/edisi/utara/tahun-cabaran-kesederhanaan-1.343714> 15 Jun 2016
- Anon. 2015 Apa Itu Komuniti? <http://gmm.fsksm.utm.my/~scrg/faq.php> 8 Jun 2016
- Anon. 2015. 100 Hari Menuju Pembentukan Komuniti ASEAN. <http://www.sinarharian.com.my/nasional/100-hari-menuju-pembentukan-komuniti-asean-1.433701> 15 Jun 2016
- Anon. 2015. Belia Main Peranan Ubah Komuniti Ekonomi ASEAN. <http://www.utusan.com.my/berita/wilayah/belia-main-peranan-ubah-komuniti-ekonomi-asean-1.151703> 14 Jun 2016
- Anon. 2015. Belia Pemacu Komuniti ASEAN. <http://www.astroawani.com/video-malaysia/belia-pemacu-komuniti-asean-72101> 7 Jun 2016
- Anon. 2015. MBM Perlu Terus Promosi Kesederhanaan, Kata Khairy. <http://www.theborneopost.com/2015/01/18/mbm-perlu-terus-promosi-kesederhanaan-kata-khairy/> 15 Jun 2016

- Anon. 2016. Belia Aset Penting Dalam Pembentukan Masa Depan. <http://www.malaysiandigest.com/bahasa-malaysia/606303-belia-aset-paling-penting-dalam-pembentukan-masa-depan-asean-ahmad-maslan.html> 14 Jun 2016
- Benedict Anderson. 1991. *Imagined Communities: Reflections on the Origin and Spread of Nationalism*. London: Verso.
- Bernama. 2015. Belia Mahukan Komuniti ASEAN Yang Tawarkan Banyak Pekerjaan, Saluran Untuk Pendapat. [http://www.kkmm.gov.my/index.php?option=com\\_content&view=article&id=9634:2015-11-17-01-15-01&catid=118:berita-terkini&Itemid=254&lang=ms](http://www.kkmm.gov.my/index.php?option=com_content&view=article&id=9634:2015-11-17-01-15-01&catid=118:berita-terkini&Itemid=254&lang=ms) 13 Jun 2016
- Bernama. 2015. Komuniti ASEAN Bergerak Ke Arah Integrasi Serantau. <http://www.bharian.com.my/node/98054> 9 Jun 2016
- Jessica Ong Hai Liaw. 2015. Integrasikan Belia ASEAN, Bina Komuniti Paksikan Rakyat. <http://www.utusan.com.my/rencana/integrasikan-belia-asean-bina-komuniti-paksikan-rakyat-1.91212> 16 Jun 2016
- Kumara Sabapatty. 2015. Komuniti ASEAN Perlu Bersatu Selesaikan Pertikaian Serantau. <http://malaysiagazette.com/ms/asean-summit/komuniti-asean-perlu-bersatu-selesaikan-pertikaian-serantau> 10 Jun 2016
- Majlis Belia Malaysia. 2015. Takwim Komuniti ASEAN 2015. <http://belia.org.my/wp/2015/02/27/takwim-komuniti-asean-2015/> 22 April 2016
- Mashitah Ibrahim. 2012. *Moderat: Antidot Barisan Nasional Menentang Politik Menghalalkan Cara*. Kuala Lumpur: Yayasan Darling.
- Mohammad Kamil Ab Majid. 2012. *Wasatiyyah Islam: Antara Liberalisme & Konservatisme Di Malaysia*. Ampang: Pekan Ilmu Publications Sdn Bhd.
- Mohd. Fitri Abdul Rahman & Mohd. Foad Sakdan. 2013. *Konflik Politik Perkauman: Strategi Dan Penyelesaian Cara Malaysia*. Kuala Lumpur: Dewan Bahasa dan Pustaka.
- Muhammad Mustaqim Mohd Zarif, Paimah Atoma & Hariza Mohd Yusof (pnyt). 2012. *Islam Dan Wasatiyyah*. Bandar Baru Nilai: Penerbit Universiti Sains Islam Malaysia
- Mustaffa Kamil Ayub. 2004. *Masyarakat Madani & Idealisme Politik*. Petaling Jaya: Institut Masyarakat Madani.
- Najib Razak. 2011. *Menjuarai Transformasi*. Kuala Lumpur: Institut Terjemahan Negara Malaysia Berhad.



- Norliah Md. Zain. 2013. Memperkasa Belia ASEAN. <http://www.pelitabrunei.gov.bn/rencana/item/1401- memperkasa-belia-asean> 14 Jun 2016
- Shahlan Ismail. 2011. 1Malaysia Menjana Negara Sejahtera Dan Bahagia Menjelang 2020. Kuala Lumpur: Centre For Glocal Concerns.
- Super User. 2015. About AYLS 2015. <http://mpbn.kbs.gov.my/introduction/background.html> 10 Jun 2016
- Tengku Faezah Tengku Yusof. 2015. Belia Mahukan Komuniti ASEAN Yang Tawarkan Banyak Pekerjaan, Saluran Untuk Pendapat. <http://www.bernama.com/bernama/v8/bm/ge/newsgeneral.php?id=1190143> 8 Jun 2016
- User1. 2016. Misi Sukarelawan Siswa YSS-ASEAN Ke Champasak, Lao PDR 2016. <http://www.sukarelawansiswa.my/?p=2270> 15 Jun 2016
- Wasitah Mohd Yusof. 2016. Komuniti ASEAN Dirangka Beri Manfaat Belia. <http://www.bharian.com.my/node/122617> 8 Jun 2016

***Profil Penulis :***

***Muhammad Ismail Aminuddin***

*Assistant Research*

*Institute of Ethnic Studies (KITA)*

*National University of Malaysia (UKM)*

*43600 Bangi Selangor, Malaysia*